

中國方志叢書·華北地方·第二十九號


據 清·梁永康等修趙錫書等纂
清道光十年修民國二十三年補刊本 影印

山東省

冠縣志

(一)

成文出版社印行



10107768

中國方志叢書·華北地方·第二十九號


據清·梁永康等修趙錫書等纂
清道光十年修民國二十三年補刊本
影印

山東省

冠縣縣志

(二)

咸文出版社印行



10107769

中國方志叢書·華北地方·第二十九號

據

清·梁永康等修趙錫書等纂
清道光十年修民國二十三年補刊本


影印

山東省

冠縣縣志

(三)

成文出版社印行



中華民國五十七年三月壹一版

冠縣志

全三冊

定價：新台幣一二〇〇元正

發行人：黃成助

出版者：成文出版社

臺北郵政信箱二二六〇五號
電話：九二二〇一〇號

印刷者：正大印製廠

三重市長生街二號之一

內政部登記證內版臺業字第一一四七號

版權所有

民國二十三年

冠縣縣志

重修冠縣志序

冠志失修垂百餘年其間提倡續修者當不乏人然類皆忽作忽輟未竟媿補全功誠憾事也余於民國二十年三月奉委來冠下車伊始即殷殷以續志事勗邑士僉唯唯乃為之開詞館羅輜軒稱饒廩給紙筆咄嗟間羣賢畢至纂修有陳君

熙雍邱君恩泉康君緯辰李君雪亭襄
纂有殷君筱盩皆知名士學通中外協力
進行風雨無間計今兩易寒暑其稿脫而
行將付梓矣取而瀏覽一過見夫疆域之
廣狹風俗之淳澆人文之盛衰禮教之變
遷以及土地物產祲祥災異莫不朗若列
眉燦然明備而尤於兵馬財賦建設教育

諸大端紀載綦詳且援引科學推陳出新
刪除歌功頌德之溢詞適合民主自治之
體制後哲踵而行之則杞宋依然文獻
足徵矣是為序

中華民國二十二年九月

署理冠縣縣長侯光陸



重修冠縣志序

余束髮受書時習聞吾冠志書燬於燹蝕於蠹散逸於兵荒離亂殘餘一二部藏於典史黃憲之家而未及見也及壯遊海外走滬漢旅厯下僦居北平爲東西南北之人忽忽二十餘年足跡所至輒取觀當地之圖誌周覽一過覺其繁簡文質形形色色而山川人物政教禮俗以及言語文字異聞軼事莫不厯厯在目勝似作乘槎遊入太廟問孟子云諸侯之寶三土地人民政事一書而三寶備之知方志一冊爲郡

縣之家珍什襲藏之莫敢或闕自古有亡國而國無
亡史廻首故鄉益惓惓於黃典史之家藏民國五年
時余官外部某日過溟南翟太史家見書齋鄴架卷
軸盈百隨手取之偶得冠縣志一書喜甚亟請於太
史曰此吾鄉故物也盍借觀之太史唯唯乃携書歸
旅邸時爲瀏覽閱竟知冠志失修將百年矣失此不
圖後將何及頻客於遠有志未遑悵悵爲何如耶十
九年春余倦遊里居多士以修志事相屬余曰噫晚
矣二十年前從事於斯老成尙在典冊猶存訂墜繼

廢事半功倍此日魯壁墟秦灰冷雪泥鴻爪漫滅殆
盡且學說朋興門戶標榜揭華袞斧鉞之跡來燒薪
覆瓿之譴於此而編年紀月踵跡筆削憂憂乎其難
之適上檄督促仿司馬溫公修資治通鑑故事開局
崇文方輶車四出周爰諮諏時值南北軍興戰雲瀰
漫薛匪犯冠遍地萑苻余亦北走燕市抵歲杪而始
抱疴還鄉人事擾擾無暇及此甫載筆而中輟矣翌
年春重整史席校書藜閣而輶軒採錄得十之一二
焉連番徵文得十之三四焉繼而殷綬彭梁越庵二

君專司行人旁徵博引得十之五六焉窮歲月之爬
羅積四卷之草帙懸之國門聚訟紛紜傳觀十閱月
久假不歸至是而再中輟矣迨及原稿珠還滿籠碧
紗方有事於修飾潤色忽而白駒繫維場無苗藿食
志乎而館穀告罄食功乎而廩餼不給墨客星散梓
人罷業至是而又中輟矣一輟再輟而至三輟何吾
冠志之阨也迴憶自清道光十年後邑志絕筆吾鄉
賢達一再擬續每以一鼓作氣再而衰三而竭遂致
一邑載籍歇絕百載倘功虧一簣再蹈前轍遲之又

久杞宋依然文獻無徵亡史之痛誰職其咎耶余於是爲之進益勇日握管城風雨無間散者輯之缺者補之罅漏幽緲者窮僻荒以探索之尋墜緒之茫茫獨旁搜而遠紹歷經萬難而書告成李復齋梁壽庵兩先生後至民國二十二年冠縣又有續志半生來抱殘守缺之遺憾至是而爲之一慰王魯之先生序前志一則曰待之君子再則曰望之後賢余何人斯敢掠此大美竊效媯補聊勝於無此物此志也綜核全書增輯十之六七前志簡要此編繁蕪貪得務多細

大不捐惟冀已往之陳蹟軼事網羅無遺不與夏五
郭公以俱泯使後之人信而有徵語焉能詳更爲踵
行者留此斷爛朝報作紹述張本浮誇之弊何避焉
至若兼三長而備五難均謝不敏矣刪訂而斧正之
是所望於達者

昔中華民國二十二年十月邑人康煥章緯宸謹序

重修冠縣志序

民族精神發源於國史英之海上霸權法之政治革命美之門羅主義日本之大和國魂皆能發揚國威鷹麟虎視據列強之一席迹其政教文化蒸蒸日上實本諸種族之特性及奕世之遺傳獨立不倚各不相襲是謂之歷史性是以各國最重史學列之專科載之文籍傳之歌謠圖繪使國人咸知古今得失之林激發其志氣因革損益以保持其固有之國粹讀世界史者類能道之我國史學與經學並重經理也

史事也經以爲經史以爲緯經緯相參而後能持理以治事上下五千年治亂興衰瞭如指掌與治同道罔不興與亂同事罔不亡千古如出一轍無待龜卜而數計此史之所以爲鑑也鑑於水則形容畢現鑑於古則成敗立見理有必然而無疑者自經學廢除史學亦略焉不講功利之習急誕怪之說起岐途亡羊擾攘至不可紀極非胚胎於厯史之劣性卽逸出於史體以外差之毫釐謬以千里辨之不可不早也帝典王謨旣不適用於晚近自檣而下當更無意於